

ҲУДУДЛАРНИНГ ИЖТИМОЙ-ИҚТИСОДИЙ РИВОЖЛАНИШИНИ СТАТИСТИК БАҲОЛАШ

**Иноятов Умидбек Улуғбекович,
ТАҚИ мустақил тадқиқотчиси,
E-mail: uma85891013@mail.ru**

Аннотация: Ушбу мақолада ҳудудларнинг ижтимоий – иқтисодий ривожланишини статистик усулларда баҳолаш, Тошкент вилояти ялпи ҳудудий маҳсулоти таркибини ўзгариш динамикасининг статистик таҳлилини амалга ошириш жараёнлари ёритиб берилган.

Аннотация: В данной статье описывается процесс статистического анализа социально-экономического развития регионов, статистический анализ динамики изменений в структуре валового регионального продукта Ташкентской области.

Abstract: This article describes the process of statistical analysis of the socio-economic development of the regions, the statistical analysis of dynamics of changes in the structure of gross regional product of Tashkent region.

Калим сўзлар: ҳудудий тадбиркорлик, ижтимоий, иқтисодий, иқтисодий барқарорлик, экспорт, кичик тадбиркорлик, тенденция, омил, инвестиция.

Кириш

Мамлакатимизда ўтказилаётган демократик бозор ислохотлари ва Ўзбекистон Республикасини янада ривожлантириш бўйича ҳаракатлар стратегиясининг энг муҳим устувор йўналишларидан бири иқтисодиётда давлат иштирокини камайтириш, хусусий мулк ҳуқуқини ҳимоя қилиш ва унинг устувор мавқеини янада кучайтириш, кичик бизнес ва хусусий тадбиркорлик (КБХТ) ривожини рағбатлантиришга қаратилган институционал ва таркибий ислохотларни давом эттириш ҳисобланади. Халқаро валюта жамғармаси (ИМФ)нинг ҳисоботида кўра, “бугунги кунда дунёда 90 фоиз корхоналар кичик ва ўрта бизнес (КЎБ)га тегишли бўлиб, улар бутун дунёнинг 63 фоиз аҳолисини иш билан таъминламоқда. Европа Иттифоқи миқёсида КЎБнинг умумий салмоғи 99,8 фоизни ташкил этгани ҳолда 85 фоиз аҳолини иш билан таъминламоқда”[1].

Ўзбекистонда ҳам мустақилликдан кейинги ўтган 26 йил мобайнида амалга оширилган ижтимоий-иқтисодий ислохотларда КБХТни ривожлантиришга алоҳида устувор йўналиш сифатида эътибор қаратилганлиги боис белгилаб берилди. Мамлакатимизнинг Биринчи Президенти таъкидлаганларидек, “...авваламбор, соҳа ривожини учун мустаҳкам қонунчилик ва ҳуқуқий база шакллантирилгани ва мунтазам такомиллаштириб борилаётгани, бизнес учун имтиёз ва преференциялар бериш, ишлаб чиқаришни техник ва технологик қайта жиҳозлаш ҳамда модернизация қилиш масалаларида давлат томонидан тизимли равишда ёрдам кўрсатилаётганини айтиш лозим”[2].

КБХТни тизимли ва комплекс равишда қўллаб-қувватлаш, ривожланишини таъминлаш, жумладан, унинг ЯИМдаги, ишлаб чиқариш ва аҳоли бандлигини таъминлашдаги улушини ошириш, кредит ресурсларига бўлган эҳтиёжини қондириш ва қулай ишбилармонлик муҳитини яратиш каби йўналишларда тизимли чора-тадбирлар амалга оширилди. Мазкур ислохотларнинг самараси ўлароқ, 2016 йил якунларига кўра[3] КБХТнинг улуши ЯИМда қарийб 57,0 фоиз, саноат маҳсулотлари ҳажмида 45,3 фоиз, қишлоқ хўжалиги маҳсулотлари ҳажмида 98,2 фоиз, асосий капиталга киритилган инвестициялар ҳажмида 39,1 фоизга етди ва жами аҳолининг 78,2 фоизи мазкур соҳада меҳнат қилмоқда.

Бироқ, республикада минтақаларида тадбиркорлик фаолияти ва кичик бизнесни ривожлантириш жараёнлари барқарор ва силлиқ кетаяпти деб бўлмайди. Бу ҳолатни мамлакатимиз раҳбари Ш.М.Мирзиёев танқид қилган ҳолда “Тадбиркорлар билан бўлиб ўтган учрашувларда шахсан ўзим шунга қаттиқ ишонч ҳосил қилдимки, улар турли маълумотнома, рухсатнома ва сертификатларни, кредит олишда неча кунлар навбатда туриш, ноқонуний текширувлар, бой берилган иқтисодий ва молиявий фойда ҳисобидан қўлга киритган..Улар ўз ишида камчилиги ва қонунбузарлик ҳолати бўлмаса ҳам турли даражадаги амалдорлар билан “келишиб олишга” мажбур бўлмоқда”[4].

Шу сабабли, минтақаларда тадбиркорлик фаолиятини ривожлантириш жараёнларининг ташкилий-иқтисодий механизмларини такомиллаштириш ва самарадорлигини ошириш, жойларда қулай ишбилармонлик муҳитини яратиш, уларнинг ташқи иқтисодий фаолиятдаги, экспортдаги иштирокини кучайтириш, аҳолини иш билан таъминлаш ва даромадларини ошириш борасидаги имкониятларидан тўлақонли фойдаланиш, ҳудудий тадбиркорлик субъектларининг турли даражаларда ривожланиш омиллари ва тенденцияларини статистик усулларда баҳолаш, статистик кўрсаткичлари тизимини ишлаб чиқиш, ҳудудий иқтисодий ривожланиш стратегиялари статистик моделларини тузиш ва статистик прогнозлашнинг илмий-услубий асосларини такомиллаштириш муҳим аҳамият касб этмоқда.

Вилоятда ижтимоий-иқтисодий ўсишни таъминлаш, ушбу ҳудудни ривожлантириш бўйича ишлаб чиқарилган дастурлар ҳамда ҳукумат томонидан тадбиркорлик субъектларини қўллаб-қувватлаш бўйича чиқарилган Қарор ва фармонлар ижросини таъминлаш даражаси ҳам муҳим аҳамият касб этади.

Жумладан, Ўзбекистон Республикаси Президентининг 2017 йил 7 февралдаги “Ўзбекистон Республкасини янада ривожлантириш бўйича ҳаракатлар стратегияси тўғрисидаги” ПФ-4947-сонли фармони асосида ишлаб чиқилган Тошкент вилояти ҳокимининг 2017 йил 1 апрелдаги 138-сонли “Тошкент вилоятини янада ривожлантириш бўйича ҳаракатлар стратегияси тўғрисида”ги қарори, шунингдек, Тошкент вилояти ҳокимининг 2016 йил 17 сентябрдаги 289-сонли “2016-2018 йилларда Тошкент вилояти шаҳарлари ва туманларини комплекс ривожлантириш чора-тадбирлари дастури тўғрисида”ги қарори ҳудуд ривожланишини таъминлашда муҳим аҳамият касб этиб келмоқда.

Мазкур Қарорларда вилоятни ижтимоий-иқтисодий ривожлантириш бўйича дастурлар ҳамда иқтисодий ривожлантиришнинг прогноз кўрсаткичлари келтириб ўтилган бўлиб уларни ижросини таъминлаш бўйича амалга оширилаётган ишлар вилоятнинг иқтисодий ривожланишини таъминлашга хизмат қилмоқда.

Ўзбекистон Республикаси Президентининг 2011 йил 24 августдаги ПФ-4354-сонли “Кичик бизнес ва хусусий тадбиркорликни янада ривожлантириш учун қулай ишбилармонлик муҳитини шакллантиришга доир қўшимча чора-тадбирлар тўғрисида”, 2015 йил 15 майдаги ПФ-4725-сонли “Хусусий мулк, кичик бизнес ва хусусий тадбиркорликни ишончли ҳимоя қилишни таъминлаш, уларни жадал ривожлантириш йўлидаги тўсиқларни бартараф этиш чора-тадбирлари тўғрисида” ва 2016 йил 5 октябрдаги ПФ-4848-сонли “Тадбиркорлик фаолиятининг жадал ривожланишини таъминлашга, хусусий мулкни ҳар томонлама ҳимоя қилишга ва ишбилармонлик муҳитини сифат жиҳатидан яхшилашга доир қўшимча чора-тадбирлар тўғрисида”ги фармонлари ва мазкур фаолиятга тегишли бошқа меъёрий-ҳуқуқий ҳужжатларда белгиланган вазифаларни амалга оширишга хизмат қилади.

Мавзуга оид адабиётлар таҳлили

Худудий тадбиркорлик ва кичик бизнеснинг миллий иқтисодиёт тармоқларидаги самарадорлигини ошириш ва ривожлантириш муаммолари Ҳ.П.Абулқосимов, Н.К.Муродова, Қ.Муфтайдинов, А.А.Қулматов[5], КБХТ фаолиятини бошқариш механизми муаммолари И.У.Ибрагимов, Р.Ходжаев, Ф.Қ.Шоюсупова, А.Эгамбердиев[6] илмий ишларида тадқиқ этилган.

Амалга оширилган илмий-тадқиқот ишлари ва олиб борилган илмий-назарий изланишларга қарамасдан, айнан бугунги глобаллашув ва демократик бозор ислохотлари шароитида худудий тадбиркорлик фаолиятини кенг қамровли статистик таҳлил қилишни такомиллаштириш, иқтисодий фаолиятига таъсир қилувчи омилларни статистик моделлар асосида баҳолашга қаратилган масалалар тизимли ҳолда ёритиб берилмаган, айрим худудлар хусусиятлари ўрганилиши билан чекланган ҳолда айнан Тошкент вилояти алоҳида тадқиқот объекти сифатида тўлақонли ўрганилмаган.

Тадқиқот методологияси

Тадқиқот жараёнида таҳлил ва синтез, индукция ва дедукция, иқтисодий-математик моделлаштириш, статистик, корреляцион ва регрессион таҳлил, эксперт баҳолаш, илмий абстракциялаш ва бошқа усуллардан кенг фойдаланилди.

Тадқиқот натижаларининг амалий аҳамияти ишлаб чиқилган таклифлар ва амалий тавсиялардан республика минтақаларида худудий тадбиркорлик фаолиятини ривожлантириш ҳамда прогнозлашда, соҳани янада самарали ривожлантириш бўйича манзилли дастурий ҳужжатларни ишлаб чиқишда қўлланилади.

Таҳлил ва натижалар

Статистик маълумотлар 1990 йилларда Ўзбекистон ялпи ички маҳсулоти (ЯИМ)да кичик тадбиркорликнинг улуши атиги 10 фоиз атрофида бўлганлигини кўрсатиб, мазкур ислохотларнинг самараси ўлароқ, 2016 йил

якунларига кўра кичик бизнес ва хусусий тадбиркорликнинг улуши ялпи ички маҳсулотда қарийб 57,0 фоиз, саноат маҳсулотлари ҳажмида 45,3 фоиз, қишлоқ хўжалиги маҳсулотлари ҳажмида 98,2 фоиз, асосий капиталга киритилган инвестициялар ҳажмида 39,1 фоизга етди ва жами аҳолининг 78,2 фоизи мазкур соҳада меҳнат қилмоқда.

Тошкент вилояти ҳудудий жойлашиш ҳамда иқтисодий ривожланганлик нуқтаи назаридан стратегик аҳамиятга эга бўлган ҳудудлардан бири ҳисобланади. Вилоят ҳудуди мамлакат ҳудудининг 3.3 фоизини ташкил қилсада, унинг ялпи ҳудудий маҳсулот (ЯҲМ)и мамлакат ялпи ички маҳсулоти (ЯИМ)нинг 10,3 фоизини ташкил қилиб, Тошкент шаҳридан кейин иккинчи ўринда туради.

Тошкент вилоятининг бошқа ҳудудлардан ажралиб турувчи яна бир хусусияти бу ҳудудда саноатнинг нисбатан юқори даражада ривожланганлигидир. Ўзбекистон Республикасида яратилган саноат маҳсулотининг 15.2 фоиздан ортиғи мазкур ҳудуднинг улушига тўғри келади. Бундан ташқари саноатнинг ЯҲМдаги улуши 32.6 фоизни ташкил қилади.

Вилоят салоҳиятини кўрсатиб ўтиш ҳамда унинг мамлакат ижтимоий-иқтисодий ривожланишини таъминлашдаги аҳамиятини очиқ бериш мақсадида биз мамлакат асосий макроиқтисодий кўрсаткичларини шакллантиришда вилоятнинг улушини таҳлилий кўриб чиқамиз (1-расм).



1-расм. Мамлакат макроиқтисодий кўрсаткичларни шакллантиришда

Тошкент вилояти ва бошқа ҳудудларнинг улуши

Манба: Ўзбекистон Республикаси Давлат статистика қўмитаси ҳамда Тошкент вилояти статистика бошқармаси маълумотлари асосида муаллиф томонидан ҳисобланган.

Мамлакатимизда ҳудудларнинг экспорт салоҳиятини ошириш ҳамда халқаро стандартларга жавоб берадиган маҳсулотлар ишлаб чиқариш орқали жаҳон бозорига чиқиш бўйича амалий ишлар олиб борилаётган бир шароитда вилоятнинг экспортдаги улуши 9,8 фоизни ташкил қилмоқда. Шунингдек,

чакана савдо айланмаси ҳамда жами хизматларда вилоятнинг улуши мос равишда 10,8 ва 9,3 фоизни ташкил қилаётганлигини кўришимиз мумкин.

Маълумотлардан кўринадикки, бу ерда энг кичик кўрсаткич қурилиш ишларига тўғри келмоқда. Яъни мамлакатдаги қурилиш ишларининг 5,4 фоизигина вилоят ҳиссасига тўғри келмоқда. Инвестициялар борасида ҳам вилоятдаги кўрсаткични эътиборга молик деб бўлмайди, чунки юқоридаги келтирилган маълумотларга нисбатан ҳамда вилоятнинг салоҳиятидан келиб чиққанда 7,7 фоиз улушга эга. Қишлоқ хўжалиги, ўрмон ва балиқчилик хўжалигида вилоятнинг улуши 12,6 фоизни ташкил қилиб, мамлакатда салмоқли ўрин эгалламоқда.


Юқорида олиб борилган таҳлил натижаларидан кўринадикки, вилоятда ижтимоий-иқтисодий ривожланишни таъминлаш мамлакатнинг ижтимоий-иқтисодий ривожланишини таъминлашда муҳим аҳамият касб этади. Буни инобатга олган ҳолда биз ҳудуднинг ижтимоий-иқтисодий ривожланиш тенденциясини ва ундаги ўзгаришларни ўрганган ҳолда баҳолаб ўтамыз.

Бунинг учун биз ЯИМ билан ЯХМнинг ўсиш динамикасини статистик таҳлил қилган ҳолда улардаги ўзгариш тенденцияларини бир-бирига мос тушириш ёки тушмаслиги ҳамда уларнинг барқарорлигини кўриб чиқамиз (2-расм). Биз таҳлилни 2006-2016 йиллар маълумотлари асосида амалга ошириб ўтамыз. Мазкур статистик таҳлилда биз нафақат иқтисодий ўсиш балки иқтисодий ўсишни барқарорлигига ҳам тўхталиб ўтмоқчимиз.

Олиб борилган статистик таҳлил натижаларига кўра, биз таҳлил қилаётган 2006-2016 йиллар мобайнида Ўзбекистонда ЯИМнинг ўртача ўсиш даражаси 8.3 фоизни, Тошкент вилоятида ЯХМнинг ўртача ўсиш даражаси 7.4 фоизни ташкил этди. Бу ердан кўришимиз мумкинки мазкур давр мобайнида Тошкент вилоятида ўртача ўсиш даражаси пастроқ.

Вилоят ЯХМининг ўсиш тенденциясидаги ўзгаришларга эътибор қаратадиган бўлсак, асосий пасайиш даври 2008 ва 2012 йилларга тўғри келмоқда, яъни биринчи пасайиш жаҳон молиявий-иқтисодий инқирози содир бўлган йилга тўғри келган бўлиб, 2009 йилдан бошлаб ўсиш таъминланган бўлса, иккинчи пасайиш 2011 йилдан бошлаб кузатила бошлаган бўлиб, 2012 йилда қуйи нуқтасига етган. Кейинги 4 йилда бироз пасайиш кузатилсада иқтисодий ўсиш деярли барқарор бўлган. Биз бу ерда 2006-2016 йиллар мобайнида вилоят ЯХМи ўсиш даражасида иккита кескин пасайишни кузатдик ва уларнинг сабабларини қуйида иқтисодиёт тармоқларидаги ўзгаришларини таҳлил қилиш давомида аниқлаймиз.


Юқорида келтирилган иқтисодий нобарқарорлик ҳамда пасайишларнинг сабабини ўрганиш мақсадида даставвал уни таркибий жиҳатдан ўзгариш динамикасини таҳлил қилиб ўтамыз. Буни инобатга олган ҳолда Тошкент вилояти ЯХМи таркибини ўзгариш динамикаси статистик таҳлилинини амалга оширамыз (3-расм).



2-расм. Ўзбекистон Республикаси ЯИМи ҳамда Тошкент вилояти ЯХМининг динамикаси

Манба: Ўзбекистон Республикаси Давлат статистика қўмитаси ҳамда Тошкент вилояти статистика бошқармаси маълумотлари асосида муаллиф томонидан ҳисобланган.

Вилоят ЯХМ таркибини қараб чиқадиган бўлсак, унда асосий ўринни саноат ва қишлоқ хўжалиги эгаллайди. Республика ЯИМда саноатнинг улуши 2006 йилда 21,8 фоизни ташкил этгани ҳолда, вилоят ЯХМда саноатнинг улуши 36,2 фоизни ташкил қилган. Аммо саноатнинг ЯХМдаги улуши камайиш тенденциясига эга бўлиб, бу тенденция 2011 йилгача сақланиб қолган бўлиб, шу йили у ўзининг энг қуйи кўрсаткич 25,5 фоизга етган. Кейинги йилларда эса саноатнинг улушини ошиши таъминланиб, 2016 йилда 32,6 фоизга етган.




3-расм. Тошкент вилояти ЯХМ таркибининг ўзгариш динамикаси

Бирок, ўрганилаётган йилларда саноатда иқтисодий ўсиш таъминланмади деган хулосани чиқаришга асос бўла олмайди, чунки 2008 йилни инобатга

олмаганда таҳлил қилинаётган барча йилларда ҳудудда саноат маҳсулотлари ишлаб чиқаришни ўсиш тенденцияси кузатилган. Аммо дастлабки даврда унинг ўсиш тенденциясини бошқа соҳаларга нисбатан паст даражада бўлиши ЯҲМдаги улушини пасайишини таъминлаган.

Худди шу ҳолатни қишлоқ хўжалиги мисолида ҳам кузатишимиз мумкин. Яъни 2006-2016 йиллар мобайнида қишлоқ хўжалигида яратилган маҳсулот миқдори 1,79 баробарга ўсиши кузатилган бўлсада, унинг ЯҲМдаги улуши 28,5 фоиздан 18,2 фоизга камайган. Бироқ, статистик маълумотларни кўрсатишича мазкур даврда қишлоқ хўжалигида ўртача йиллик ўсиш суръати 6,7 фоизни ташкил қилган (4-расм).



4-расм. Тошкент вилояти ЯҲМи ва тармоқлардаги ўсиш суръатини йиллар бўйича динамикаси

Биз юқоридаги таҳлилларимизнинг мантиқийлигини давом эттириш мақсадида ЯҲМ ҳамда иқтисодий тармоқларнинг ўсиши ҳамда таркибий жиҳатдан ўзгаришини 4-расм маълумотлари асосида таҳлил қилиб ўтамыз. Олиб борилган таҳлилларда ЯҲМнинг ўсиш суръатини пасайишини 2008 - 2012 йилларга тўғри келганлигини кўрган эдик. Биринчи, яъни 2008 йилдаги пасайишни вилоятда саноат маҳсулотлари етиштиришдаги пасайиш билан изоҳлашимиз мумкин, чунки саноатнинг ЯҲМдаги салмоқли улушга эгаллиги ҳамда айнан мазкур йилда соҳадаги ўсиш даражасини манфий бўлганлигини инобатга оладиган бўлсак, яъни улушни 35,5 фоиздан 29,2 фоизга камайганлиги ва ўсиш даражаси – 3,8 фоизни ташкил қилгани уни иқтисодий пасайишнинг асосий сабабчиларидан бирига айлантормоқда.

Шунингдек, 2012 йилда ЯҲМ ўсиш даражасини пасайиши қурилиш ва савдо соҳасидаги кескин пасайиш ҳамда транспорт ва алоқа соҳасидаги пасайиш билан изоҳлаш мумкин. Чунки қурилиш соҳасидаги ўсиш даражаси 2011 йилда 29,2 фоизни ташкил қилган бўлса, 2012 йилга келиб у 13,7 фоизга тушиб қолган. Савдо соҳасида мазкур кўрсаткичлар мос равишда 18,8 ва -4,2 фоизни ташкил қилган. Шунингдек, ЯҲМ ўсиш суръатлардаги

нобарқарорликни қурилиш, савдо ҳамда транспорт ва алоқа соҳасидаги ўсиш даражасининг нобарқарорлиги ҳисобига таъминланганлигини ҳам кўришимиз мумкин.

Вилоят ЯХМида саноатнинг улушини юқори эканлигини ва таҳлил учун асос қилиб олинган йилларда унинг улушини камайиш ва ўсиш тенденциясига эга эканлигини инобатга олган ҳолда унинг таркиби жиҳатдан ўрганиб чиқишни мақсадга мувофиқ деб топдик. Қуйида келтирилган 1-жадвал маълумотларидан кўришимиз мумкинки вилоятда саноат маҳсулотлари ишлаб чиқаришда асосий ўринни машинасозлик ва металлни қайта ишлаш эгаллайди. Бироқ мазкур йўналишнинг вилоятда ишлаб чиқарилган саноат маҳсулотларидаги улуши камайиш тенденциясига эга бўлиб, 2006 йилда 55,9 фоизни ташкил қилган бўлса, 2015 йилга келиб 33,5 фоизга тушган.

Саноат маҳсулотлари ишлаб чиқаришда кейинги йилларда кескин ва ижобий ўзгаришни озиқ-овқат саноатида кузатишимиз мумкин. Яъни озиқ овқат саноатининг улуши 2006 йилда 6,4 фоизни ташкил қилган бўлса, 2010 ва 2015 йилларда мос равишда 13,6 ва 22,4 фоизни ташкил қилган. Бундан кўринадики, озиқ-овқат саноатининг умумий саноат маҳсулотларидаги улуши кейинги декадада 3.5 баробарга ошганлигини кузатишимиз мумкин.

Ёқилғи саноатининг улуши дастлабки 5 йилликда ўзгаришсиз қолганлигини ва кейинги 5 йилликда 1,8 фоиздан 2,7 фоизга, яъни 1,5 баробарга ошган. Кимё ва нефть кимёси, енгил саноатда дастлабки 5 йилда ўсиш кузатилиб, кейинги 5 йилда бироз пасайиши кузатилган. Ёғочни қайта ишлаш ва қоғоз-целлюлоза ҳамда қурилиш материаллари саноатида дастлабки 5 йилда пасайиш ва кейинги 5 йилда ошиш кузатилган, саноатдаги улуши нуқтаи назаридан 2006 йилдаги ҳолатига эриша олинмаган (1-жадвал).

1-жадвал

Тошкент вилоятида саноат маҳсулотлари ишлаб чиқаришнинг тармоқлар таркиби

Тармоқлар номи	2006 йил	2010 йил	2015 йил
Саноат маҳсулотлари ишлаб чиқариш	100.0	100.0	100
<i>Шу жумладан тармоқлар бўйича:</i>			
Ёқилғи	1.8	1.8	2.7
Кимё ва нефть кимёси саноати	8.5	8.80	7.9
Машинасозлик ва металлни қайта ишлаш	55.9	40.5	33.5
Ёғочни қайта ишлаш ва қоғоз-целлюлоза саноати	1.6	1.3	1.4
Қурилиш материаллари саноати	7.3	6.8	7.1
Енгил саноат	7.2	11.7	9.3
Озиқ-овқат саноати	6.4	13.6	22.4
Бошқа тармоқлар	11.3	15.5	15.7

Юқоридагилардан келиб чиққан ҳолда, фикримизча, вилоятнинг ижтимоий-иқтисодий ривожланишини таъминлаш, жумладан саноат маҳсулотлари ишлаб чиқаришни ошириш бир қатор муаммоларни бартараф

этишни талаб қилади. Булар:

- корхоналарни хомашё билан таъминлаш ҳамда сотилган маҳсулот учун тўловларни амалга ошириш жараёнидаги шартнома шартларини бузилиш ҳолатларини бартараф этиш;


- корхоналар бозорларини ҳудудий жиҳатдан диверсификация қилиш, яъни ички ва ташқи бозорларда янги бозорларни излаб топиш ва эгаллаш. Чунки олиб борилган изланиш натижаларига кўра ички ва ташқи бозорда ҳудудий жиҳатдан фақат бир ҳудудга ёки бир нечта буюртмачига тобе бўлиб қолиш улардаги ҳар қандай ўзгаришни корхона фолиятига тўғридан-тўғри таъсир қилишини таъминлайди.

- корхоналарни реконструкция қилиш орқали маҳсулотларни миқдор ва сифат жиҳатдан диверсификациялаш.

Юқорида келтирилган муаммоларни бартараф этилиши барқарор ўсишни таъминлаш, саноатнинг ЯХМдаги улуши 2006 йилдаги даражасига кўтариш ҳамда саноат маҳсулотлари билан ички бозорни тўлдириш ва экспорт салоҳиятини оширишга хизмат қилади.

Вилоятнинг ижтимоий-иқтисодий ривожланишини статистик таҳлил қилар эканмиз, ҳудудни ижтимоий-иқтисодий ривожланиши бевосита ташқи савдо яъни экспорт импорт операциялари билан боғлиқ эканлигини ўргандик. Жумладан вилоятдаги кўпчилик асосий саноат корхоналарини фаолияти айнан хомашё импорти ёки бўлмаса тайёр маҳсулот экспорти билан чамбарчас боғлиқ эканлигини аниқладик.

Юқоридагиларни инобатга олган ҳолда биз Тошкент вилоятининг ташқи савдосини таҳлилий ўрганган ҳолда унинг ҳудуд ижтимоий-иқтисодий ривожланишидаги аҳамияти ҳамда ролини баҳолаб ўтишга ҳаракат қиламиз. Бунинг учун даставвал биз экспорт ва импортнинг 2006-2016 йиллардаги ўзгариш динамикасини ўрганиб чиқамиз (5-расм).




5-расм. Тошкент вилояти экспорт ва импорт ҳажми ўзгаришини йиллар бўйича динамикаси

Вилоят экспорт ва импорт операциялари бўйича юқори салоҳиятга эга бўлган ҳудудлар сирасига киради. 2016 йилда вилоят экспортининг умумий мамлакат экспортидаги улуши 9,8 фоизини ташкил қилган, аммо мазкур кўрсаткич 2006 йилда 16,8 фоизни ташкил қилган. Импорт нуқтаи назаридан қараганда мазкур кўрсаткичлар мос равишда 13,8 ва 11,6 фоизни ташкил қилган. Бу ердан кўришимиз мумкинки, умумий мамлакат кўрсаткичларига нисбатан экспорт улушининг камайиши импорт улушининг ошиши кузатилган. Натижада соф экспорт миқдори камайиб борганлигини ва охириги йилларга келиб анча пасайганлигини кўришимиз мумкин. Мазкур кўрсаткич 2006 йилда 558,4 миллион АҚШ долларини ташкил қилган бўлса, 2016 йилга келиб -452,6 миллион АҚШ долларига тенг бўлган. Бироқ мазкур кўрсаткич 2015 йилда 187,1 миллион АҚШ долларига тенг бўлган, 2013 ва 2014 йилларда эса мос равишда -5,1 ва -8,1 миллион АҚШ долларига тенг бўлган.

Ушбу жараёни оқибатларини вилоятдаги ҳудудлар ҳамда экспортёр корхоналар доирасидаги ўрганиш натижаларига кўра хорижда ва Россия Федерациясидаги иқтисодий инкироз натижасида маҳаллий корхоналарда ишлаб чиқарилаётган маҳсулотларга талабнинг кескин даражада камайиб кетганлиги аниқланди.

Ўсиш тенденцияси нуқтаи назаридан олиб қараганда импорт ҳамда экспорт ўртасида умумий тенденция мавжуд бўлиб, улардаги асосий пасайиш 2008-2009 ва 2011-2012 йилларга тўғри келмоқда. Фақат ягона фарқ экспортдаги пасайиш импортдаги пасайишга нисбатан кескин ва қуйи нуқтадаги ҳолатни сақланиб қолиш муддати узоқроқни ташкил қилмоқда (6-расм).



6-расм. Тошкент вилояти экспорт ва импортидаги ўсиш суръатини йиллар бўйича динамикаси

Натижада экспорт билан импорт ўртасидаги фарқ қисқариши ҳамда соф экспорт миқдорини ўзгариш тенденцияси манфий бўлишини таъминламоқда. 2016 йилга келиб, экспортнинг кескин қисқариши, бошқа томондан импортнинг ошиши натижасида улар ўртасидаги фарқни кескинлашганлигини ва соф

экспорт кўрсаткичи таҳлил қилинаётган йиллардаги энг қуйи даражасига етганлигини кўришимиз мумкин.

Шунингдек, худди ЯХМнинг ўсиш тенденциясидаги каби ўзгаришни айнан экспорт ва импортда ҳам кузатиш мумкин. Бундан хулоса қиладиган бўлсак, ЯХМ билан экспорт ва импорт ўртасида бевосита боғлиқлик мавжуд. Юқоридаги таҳлил натижаларидан маълумки, саноат корхоналарининг кўпчилигининг фаолияти бевосита ташқи савдога боғлиқдир.

Амалга оширилган таҳлилларга асосланган ҳолда хулоса қиладиган бўлсак, вилоят ижтимоий-иқтисодий ривожланишида ўсиш таъминланаётган бўлишига қарамадан нобарқарорлик мавжуд, шунингдек, саноатнинг ЯХМдаги улуши юқори бўлишига қарамадан пасайиш тенденцияси кузатиш мумкин.

Чунки 2008 йилдаги пасайишнинг асосий сабабларидан бири сифатида саноат қараладиган бўлса, 2012 йилда ЯХМ ўсиш даражасини пасайиши курилиш ва савдо соҳасидаги кескин пасайиш ҳамда транспорт ва алоқа соҳасидаги пасайиш билан изоҳланади. Саноатдаги ўзгаришларни статистик таҳлил қилиш мобайнида у ердаги пасайишнинг асосий сабабларидан бири йирик саноат корхоналари маҳсулотларига бўлган талабни ички ва ташқи бозорлардаги қисқариши келтирилади.

Хулоса ва таклифлар

1. Мамлакатимизда иқтисодийни модернизациялаш ҳамда бозор ислохотларини янада чуқурлаштириш шароитида аҳоли бандлигини таъминлаш ва даромадларини ошириш, мамлакат экспорт салоҳиятини ошириш орқали тўлов баланси мусбат сальдосини таъминлаш, бир сўз билан айтганда мамлакатни барқарор ижтимоий-иқтисодий ривожланишини таъминлашда тадбиркорлик, жумладан ҳудудий тадбиркорлик фаолиятини ривожланганлик даражаси асосий омиллардан бири ҳисобланади.

2. Ҳудудий тадбиркорликнинг ишлаб чиқариш самарадорлигини ошириш, инновацион фаолиятни ривожлантириш учун қулай шароит яратиш мақсадида давлат хусусий ташаббускорликни инновацион тадқиқотларга қаратувчи қулай бизнес муҳитини шакллантириши; таркибий ислохотларни оптималлаштириши; микро, мезо ва минтақавий даражаларда инновацион инфратузилмани ривожлантиришга кўмаклашиши (суғурталаш, инновацион воситачилар институти, технопарклар ва ҳакозо)и лозим. Бу жараёнда хусусий тадбиркорлар бизнесни ташкил қилишнинг анъанавий моделидан инновацион моделига ўтиш имконини қўлга киритадилар.

3. Таҳлилларга кўра, ҳудудий тадбиркорлик ривожланишининг туманлар ва шаҳарлар кесимидаги имкониятларидан амалиётга тўлароқ фойдаланиш учун маҳаллий эҳтиёжни туманлараро қондиришга қаратилган тадбиркорлик субъектлари (мини ғишт заводи, сутни қайта ишлаш ва консерва заводлари каби) ни барпо этиш вилоятда синергик самарадорлик ортишининг муҳим манбаларидан ҳисобланади. Бунда ҳар бир туманнинг тадбиркорлик муҳитидаги заифликларга бошқа туман (ёки шаҳар) нинг афзалликларини жалб этиш эвазига барҳам берилади. Пировардида туманларнинг ишлаб чиқариш ва

хизмат кўрсатиш салоҳияти минтақа аҳолиси эҳтиёжларини тўлароқ қондиришга замин бўлади.

Фойдаланилган адабиётлар рўйхати

1. <http://www.imf.org/external/pubs/ft/sdn/2015/sdn1504.pdf>
2. Ўзбекистон Республикаси Президентининг «Ўзбекистонда ижтимоий-иқтисодий сиёсатни амалга оширишда кичик бизнес ва хусусий тадбиркорликнинг роли ва аҳамияти» мавзусидаги халқаро конференциянинг очилиш маросимидаги нутқи. 2012 йил 14 сентябрь. – www.uza.uz
3. Ўзбекистонда кичик тадбиркорлик. Ўзбекистон Республикаси Давлат статистика қўмитаси. Статистик тўплам. – Т., 2017, 18-50-б.
4. “Танқидий таҳлил, қатъий тартиб-интизом ва шахсий жавобгарлик – ҳар бир раҳбар фаолиятининг кундалик қонидаси бўлиши керак” мавзусидаги Ўзбекистон Республикаси Президенти Шавкат Мирзиёевнинг мамлакатимизни 2016 йилда ижтимоий-иқтисодий ривожлантиришнинг асосий яқунлари ва 2017 йилга мўлжалланган иқтисодий дастурнинг энг муҳим устувор йўналишларига бағишланган Вазирлар Маҳкамасининг кенгайтирилган мажлисидаги маърузаси// <http://uza.uz/oz/politics/tan-idiy-ta-lil-atiy-tartib-intizom-va-shakhsiy-zhavobgarlik-16-01-2017>.
5. Абулқосимов Ҳ.П., Қулматов А.А. Ўзбекистонда кичик бизнес соҳасида оилавий тадбиркорликнинг ўрни ва уни ривожлантириш йўллари. Монография. – Т.: Университет, 2015. – 126 б.
6. Муродова Н.К. Кичик бизнес субъектларининг тадбиркорлик фаолиятини ошириш йўналишлари. Дис. иқт. фан. номз. – Т., 2008.
7. Муфтайтидинов Қ. Иқтисодий эркинлаштириш шароитида тадбиркорликни ривожлантириш муаммолари. Дис. ... иқт. фан. д-ри. – Т., 2004.;
8. Қулматов А.А. Ўзбекистонда кичик тадбиркорлик фаолиятини ривожлантиришнинг ижтимоий-иқтисодий муаммолари. Дис. ... иқт. фан. номз. – Т., 2004.
9. Ибрагимов И.У. Кичик бизнес ва хусусий тадбиркорлик фаолиятини бошқариш механизмини такомиллаштириш (Наманган вилояти мисолида). Дис. иқт. фан. номз. - Т., 2012.;
10. Ўзбекистон Республикаси Давлат статистика қўмитасининг 2000-2016 йиллардаги статистик маълумотлари.
11. Тошкент вилояти статистика бошқармасининг 2000-2016 йиллардаги статистик маълумотлари.